

Hairlahović (Husein i Hatidža) Lejla  
Nijaza Begića S/32, 77220 Cazin  
[lejlaboss@hotmail.com](mailto:lejlaboss@hotmail.com)  
061 850 030

Cazin, 17.02.2015. godine

**Predmet: Informacija o diskriminaciji na konkursu za prijem u državnu službu**

Ovim putem Vam želim ukazati na diskriminaciju na konkursu za prijem u radni odnos u Agenciju za visoko obrazovanje i osiguranje kvaliteta BiH (u daljem tekstu: Agencija).

Ja sam Lejla Hairlahović, magistrica evropskih studija i doktorandica etnologije i kulturne antropologije na Sveučilištu u Zagrebu. Prijavila sam se na objavljeni konkurs u Agenciji u martu 2014.godine za radna mjesta višeg stručnog saradnika za visoko obrazovanje i višeg stručnog saradnika za osiguranje kvaliteta. Položila sam ispit općeg znanja i pozvana sam na pismeni dio ispita u Banju Luku. Na istom sam osvojila maksimalan broj bodova, 100, kao i dvojica kandidata, Bojan Stevandić i Dalibor Ateljević. Za Stevandića mi je već ranije rečeno da će biti zaposlen jer je tu odradio pripravnički staž, a to se nije bodovalo konkursom. Komisija je odradila intervju sa nama i ocijenila nas nakon što smo svi završili razgovor. Tako se, vjerovatno uz dogovor, utvrdila rang lista po kojoj Stevandić dobija maksimalnih 30 bodova, Ateljević 29, a ja 28 bodova. Agenciji sam se obratila sa zahtjevom za uvid u konkursnu dokumentaciju. Na uvid sam dobila tabele o bodovanju, bez imena članova komisije i bez njihovih komentara i zabilješki. Na pitanje na osnovu čega smo dobili određeni broj bodova, rečeno mi je da je to **diskreciono pravo svakog člana komisije**.

Imajući u vidu da se konkretno nalazim na listi eksperata pri Agenciji i da sam prošla sve obuke za stručnjake koji ocjenjuju i obavljaju reviziju kvaliteta i daju preporuke o akreditaciji visokoškolskih ustanova i studijskih programa, te posebno naglašavajući da sam članica Komisije domaćih i međunarodnih stručnjaka za akreditaciju visokoškolske ustanove „Univerzitet u Sarajevu“, a cijeneći da se kandidat Ateljević uopće ne nalazi na listi eksperata, a samim time nije ni prošao obuke ([http://www.heg.gov.ba/Kvalitet/lista\\_eksperata/?id=1168](http://www.heg.gov.ba/Kvalitet/lista_eksperata/?id=1168) ), postavlja se pitanje na osnovu čega je kandidat Ateljević dobio prednost od Komisije. Komisiju na intervjuu sam upoznala sa činjenicom da sam na listi eksperata (studenti), da imam završen poslijediplomski studij iz oblasti evropskih integracija, te da sam u 5. semestru doktorskog studija u Zagrebu. Nejasno je da za upražnjenu poziciju nisu kao prednost uzete ove činjenice.

Ako već predmetna komisija nije uzela kao prednost navedene činjenice, **sa žaljenjem konstatujem da je jedini kriterij kojim se komisija vodila diskriminatorski kriterij u odnosu na spol, nacionalnost i prebivalište jer sam sama kandidat iz entiteta Federacija BiH i u prijavi sam kao nacionalnost navela da sam Bošnjakinja.**

Nakon što je moja žalba odbijena od strane Odbora državne službe za žalbe, iskoristila sam mogućnost obraćanja Sudu Bosne i Hercegovine.

Iskreno se nadam da će Vas ova slučaj zainteresirati, iako je ovakvih slučajeva u BiH mnogo, te da ćete pomoći u mojoj borbi protiv diskriminacije u državnim institucijama, te u mojoj borbi protiv davanja ovlasti komisijama da na subjektivan način, uz diskreciju, vrše negativnu selekciju. U svojoj dosadašnjoj karijeri prosvjetne radnice, sportašice, voditeljice velikog sportskog kolektiva, te kulturne radnice dala sam svoj doprinos razvoju Bosne i Hercegovine. Ovaj slučaj diskriminacije na koji sam naišla nije me obeshrabrio i odlučna sam da se borim za svoja prava, ma koliko to trajalo.

Za sve dodatne informacije, stojim Vam na raspolaganju.

S poštovanjem,

Mr.sci. Lejla Hairlahović